



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 8

Jharkhand nung state sorkari
doctor tem 'leave' ajak thinentsür

2027 FIFA Women's World Cup
Maracana nunga asayatsü



VOL. XXII ISSUE NO. 205 (ADOK 205)

DIMAPUR

KÜPTOKNÜ (SATURDAY)

MONUPII (MAY) 10, 2025

₹ 5.00

MHA-i 'emergency powers' benoktsü tuyur

New Delhi, May 9, 2025 (Agencies): Ministry of Home Affairs (MHA)-i state aser Union Territory ajak nung chief secretary aser administrator ajak dang Civil Defence Rules kübok emergency powers benoktsü ayongzükogo.

Iba tetuyuba ya mapang shitak nung nüngdakba precautionary measures inyaktsü nükjidong nung agütsüogo. State aser UT ketdangsürtemi tarutsü nung civil defence maparen inyaktsüsa tensa ajurudang

mapa shitak inyaktsü MHA-isa metetdaksüogo.

MHA-i züluba shidi nung tensa indang shia mali saka ibala tashi ya alima lendongtsüdong atalokdang, public health emergencies mesüra law and order tebilemtsü tulu ajurudang benshir.

Civil Defence Rules ajanga local administrations-i resources yaritepa amshir, public safety protocols benoker aser emergency response mechanisms tip atemer.

Manipur Governor-i Tangkhul Naga nunger den ajurutepe

Imphal, May 9, 2025 (Agencies): Manipur Governor Ajay Kumar Bhalla-i Hokolbarnü Tangkhul Naga nunger den ajurutepe senden amen aser idangji lisopurtemi timtem ajuruba indang lemsatep.

Iba senden nung Ukhrul aser Kamjong district tem nung aliba lisopurtem indang tebilemtsütem benoka jembi.

Tangkhul Naga nunger tongti telok Tangkhul Naga Long (TNL)-i Brihostibarnü Raj Bhavan, Imphal nung Governor den ajurutepe memorandum ka agütsüba sülen tanü iba senden ya menogo.

TNL-i agütsüba memorandum nung Manipur Legislative Assembly nung lisopur nem menden talila lemozüksütsü takhangba agüja lir.

Züngsem 60 agi akümba

Manipur Legislative Assembly nung tang lisopur nem menden 20 lemozükja lir.

TNL-isa state budget lemsaba nung kin balala nüngdaktem peritsüsa agütsütsü shia lir. Iba ajanga terenlok bener arutsü aser loktiliba nung ajak ajangzüksüsa senotsü lemsatettsü ta parnoki ashi.

Parnokisa Ukhrul nung Tangkhul Naga Long atema office complex aser multi-purpose convention ka yanglutsü memorandum nung metetdaksüogo.

Iba facility ya lokti sentongtem aser administrative functions atema tongti tesem ka akümtsü ta TNL-i ashi.

Governor Bhalla-i TNL teshimtet telok dang parnoki benokba onüktem shisadangtsü aser Manipur nung lisopurtemi timtem ajurubatem koktettsü atema mapa inyaktsü nangzük.

Khelo India Youth Games 2025 nung Nagaland esports teloki shilem agi

Dimapur, May 9, 2025 (TYO): Tang mezüng atema Nagaland nungi teshimtet telok kati Khelo India Youth Games 2025 nung esports category nung shilem agiogo.

Iba national-level event ya May 6 & 7, 2025 anogotem Patna, Bihar nung agi aser idangji Esports tenzük ta Department of Youth Resources and Sports, GoN-i metetdaksü.

Nagaland contingent nung nisung 9 dena liasü. Parnok rongnung asayar 7, team manager ka aser coach ka liasü. Parnoki Nagaland tenüng nung: eChess, eFootball, aser Battlegrounds Mobile India (BGMI) esports disciplines 3 nung shilem agia liasü.

Iba ajanga Nagaland sorkari digital putu nung lanurtem

yaritsü aser maongka tasentem bushitsü tenangzükba sayur.

May 4, 2025 nü Hotel Grand Vista, Dimapur nung orientation programme ka ayonga agi aser idangji esports indang tesayuba balala agüja liasü.

Iba sentong nung Dimapur Government College nung Assistant Professor and Head of the Department of Psychology Dr. Temsusenla Jamir-i okila jembi.

Nagaland tenüng nung eFootball category nung Lamgouhao Kipgen-i Arunachal Pradesh madak takok ngua mezüngbuba jenjang takok angu.

Department of Youth Resources and Sports-i esports teshimtet telok dang pelaba metetdaksüogo.

Pakistan-i anogo ananübuba India tsütsü drones khaloktsü



New Delhi, May 9, 2025 (Agencies): Pakistan-i anogo ananübuba Jammu and Kashmir, Punjab aser Rajasthan kübok tesem balalai drones khaloktsüogo.

Jammu and Kashmir kübok Jammu, Samba aser Rajouri, Punjab kübok Pathankot aser Amritsar aser Rajasthan kübok Pokhran tsütsü khaloktsüba drones ajak sottetogo.

Maneni, Kashmir district kübok Kupwara nung LoC anasa artillery firing aser Samba, Poonch, Uri, o Nowgam Handwara Sector nung shelling asüba osangtem angazüker.

Pathankot aser Jammu nung anüaonung atongtepa blackout den sirens asatenogo. Yashi Pakistan-i iba tesem ana nung mitkartem tesep balala nung tenük yoka drones khaloktsü.

Iba osang zülü tashi nung

Amritsar nung injang yokba angazüker aser drone activity metetba sülen blackout ka asü.

"Ni alidak nungi bomb apokba ola, injang akhaba" ta Jammu and Kashmir Chief Minister Omar Abdullah-i ashi. Paisa Jammu aser temeket nung alirtem dang taruba ghonda ishika ki telung nung dang alia ser olulu dak mamangtsü ayongzükogo.

"Jammu aser temeket nung alirtem dang yimdong nung mesenzütsü mepishir. Taruba ghonda ishika nenok ki telung nung mesüra lendong nungi jenbutsü tesemtem dang liang. Olulu dak temulung telem aser kuli tejangja maliba osangtem meprokshtsüla" ta CM Abdullah-i metetdaksü.

Pakistani Army-i May 7 aser 8 aonung infiltration points 36 nung drones 300 nungi 400 shi khaloktsü ta Colonel Sofiya

Qureshi-i tanü osangbener dang ashi.

"Leh nungi Sir Creek tashi nisungtem yoktsü atema drones amshi. Indian armed forces-i kinetic aser non-kinetic inyakyim ajanga drones teimba khazüka yokogo" ta lai ashi.

"Drones teraksa nung forensic bushisüngdang ajanga Turkish Asisguard Songar drones ta bushitetogo" ta Colonel Qureshi-isa ashi.

"Pakistan-i May 7 aonung 8:30 ako meta drone aser missile amshia amakdang civil airspace meshibang. Parnoki civil airliners ya jung ama amshir kechiyong India-i air defence response tekaratiba nung agütsütsü parnoki meteta lir. Iba ya India-Pakistan arrtsü anasa ayimba international flights atema lendong lir" ta Wing Commander Vyomika Singh-ia ashi.

NECTAR-i "CIPS Innovation Award 2024" angu

Dimapur, May 9, 2025 (TYO): Nagaland Education Project-The Lighthouse (NECTAR) ajanga inyakba Performance Incentive Grants (PIG) asoshi "CIPS Innovation Award 2024" nguogo.

Iba sempet ya Centre for Innovations in Public Systems (CIPS), Hyderabad-i education sector atema agütsü. CIPS ya India sorkari tenzükba Administrative Staff College of India indang autonomous centre ka lir.

CIPS-i public systems nung yariteper aser asalentong tasentem purapiteta inyakba atema sempet agütsür.

NECTAR-i Performance Incentive Grants (PIG) agütsüba ajanga Nagaland tesem balala nung School Management Committees (SMCs) aser School Management and Development Committees (SMDCs) 1,914-i capacity-building support nguogo.

SMCs aser SMDCs-i shilem tajung agiba den loktitemi yaritepa PIG ajanga Government schools tajungba akümer aser loktii kibur akümba tangatetba aser tebilemtsü abener.

Lokti lennirtei aser züngsemtem mi PIG mapa inyakba nung amalitep aliba ajanga takok ngua inyaker. Iba atema NECTAR-i SMCs aser SMDCs ajak dang pelaba metetdaksüogo.

Longding nung alirtemi telungpur maparen anema lungkak ait

Itanagar, May 9, 2025 (Agencies): Arunachal Pradesh kübok Longding district nung nübortemi telungpur dak sendakba tashiyim mapa anema "United Peace Rally" ka ayongzuka agiogo.

Iba sentong ya Wancho Council-i ketdangsüa ayongzük aser nisung noklang aikati shilem agiogo. Telungpurtemi nisung pur aoba, tashiyim agi sen saruba aser nisung tepsetba anenang ta parnoki takhangba agütsü.

Iba sentong nung Wancho Wangham Council, Longding District Students Union, Gaon Burahs, Zilla Parishad

Chairpersons (ZPCs), ZPMs, aser Longding, Kanubari, Pongchau, Tissa o Wakka nungi Market Welfare Associations dena Wancho nunger telok aikati shilem agia liasü.

Lungkak aitertemi "Stop Insurgency," "No More Bloodshed," aser "Peace for Longding" tezülubatem amer lungkak aita jaja.

Tatamsa parnoki Deputy Commissioner Office nung lungkak aitba sentong tembang aser idakji tanishirtemi DC Bekir Nyorak den ajurutepe memorandum ka agütsü.

Iba memorandum nung

sorkari telungpur maparen azioktsü atema shia lir.

"Onok telungpurtem aser security forces tsüngda mejebber. Ozü nübortemi anatsülen nungi timtem ajurur" ta Wancho nunger tanishirtemi ashi.

Armed Forces Special Powers Act (AFSPA) benoka liaka Longding district nung 2018 nungi tenzüker telungpur teloktemi nisung 90 tema pur aoba atalokogo.

Longding district nung civil society teloktemi telungpur anema lokti sentong tulutiba ayonga agiba nung iba ya ka asütsü.

LAGHS nung azünger nem award balala agütsü



Principal MCTE, Dr. T. Alemla Longkumer aser kaketshir award angurtem den külemi agiba noksa.

Dimapur, Monupii/May 09

(TYO): Longrimendang Ao Government High School ya Tuli sub-division kübok Tzudikong nung Asür Longrimendang Ao'er chirnur temi agütsüba ali 3.47 acre nung lapoka lir. Asür Longrimendang Ao ya Mokokchung jila nung mezünpur aser Mopungchuket yimdak nungi lir. Par kinungeri school atema rostrum tuluka sen lakh 20 indoka yangluja lir. Longrimendang Ao Government High School nung

azüngertem lenla ajak nung tajungtiba asoshi inyaksü ajungmesoa Asür Longrimendang Ao'er kinunger temi awards ana - Academic Award in HSLC (1st division tongteter rongnung tematiba marks angur nem kulizüng kakat den sen 10,000) aser Student of the Year Award (trophy, kulizüng kakat aser sen 5,000) - tenteta agütsür.

Asür Longrimendang Ao'er semchirtem rongnung tantsütila, Dr. T. Alemla Longkumer, Principal, Mokokchung College

of Teacher Education ajanga May 9, 2025 nü Academic Award ya Arentoshi aser Student of the Year Award ya Imtisunep nem agüja liasü.

Iba sentong nung lai tebou bilemteta jembi, shiba mangdang tajung akaba aser temeim aketba nisung ka liasü, ta ashi.

Pai shisaliok tsütsü tetsür-tebur tebendang makai angatetba bilemteta par jala tem aser semchir (tetsür) temi Academic Award ya sponsor asü.

Dr. Alemla-i kaketshirtem dang academic nung takok anguba kisüing nung temulung süa malitsü saka lenla ajaklen terenlok asoshi temulung agütsütsü ayongzüka Student of the Year Award agütsü.

Laisa nükjidong tajung yur tesayur aser kaketshirtem lungjemer inyaksü ayongzüka liasü. LAGHS nung azünger kaketshir indang tsürabur temia Asür Longrimendang Ao'er kinunger temi school nung facility balala agütsüba asoshi pelaba lemsatepa liasü.

Jakhama nung 2 buba Nagaland Potato Festival agi

Dimapur, Monupii/May 09 **(TYO):** Jakhama Local Ground, Kohima nung "Celebrating the Organic Products of Nagaland" omen nung ajemdaker May 9, 2025 nü 2 buba Nagaland Potato Festival agia liasü.

State tesem ajunga nung mozü mamshi potato tsünütsü ajungmesoa aser local entrepreneurs nem sapang agüja yimdaklir rongsenketzüng tajungba kumdahtsütsü asoshi maongka agütsütsü nükjidong nung iba sentong ya ayongzü. Southern Angami region

nungi local entrepreneurs aser Kiphire aser Wokha district tem nungi arua stalls noklang dak tema amenok. Iba sentong nung Agriculture Department nungia shilem agia sustainable farming practices atema teyari agüja liasü.

Iba benjongmung nung akhumdong ka ama Minister, Tourism and Higher Education, Temjen Imna Along aden aser Nagaland indang organic produce alima nem agizükdakhtsütsü asoshi anibelem mesasai inyakba aluyimer aser stakeholders nem

tenüingsang agüja liasü.

Iba sentong nung jembi, "Asen yimtsüing yimchi-yimjung nung lira, Nagaland yimchi-yimjung nung alitsü. Asen yimer anema lira, Nagaland anema alitsü. Asen yimer livelihood lira, state nung aliba nüburtem livelihood alitsü," ta pai ashi.

Iba benjongmung yagi Nagaland nung organic farming movement ainba sayuba kisüing masü saka state nung rongsenketzüng aintsü asoshi grassroots entrepreneurship ajanga tongti shilem agiba sayur.

Niuland nung Prevention of Child Marriage campaign ayongzü

Dimapur, Monupii/May 09 **(TYO):** District Administration Niuland, Mission Shakti- Beti Bachao Beti Padhao (BBBP), District Hub for Empowerment of Women (DHEW) aser District Child Protection Unit (DCPU), Niuland lungjemer Akshay Tritiya nüngtem nung Prevention of Child Marriage indang awareness sentong ka Deputy Commissioner

Conference Hall, Niuland nung May 8, 2025 nü ayongzüka liasü.

Sentong nung S Boloka Jimo (SFL, DHEW) menden liasü aser Kelengunuo Solo, NCS, Extra Assistant Commissioner, Niuland ajanga tayongzüka o jembi.

Iba sentong nung shisalen sayur Hitoka Swu, JJB member, Niuland aser Kali

Shohe, Supervisor, Child Helpline, DCPU nungeri tanur kibong akumba nungi kumzüksü asoshi mera balala agiba indang lemsatepa liasü.

Sentong nung lokti tentet balala nungi teshimtet nisungtem aser stakeholders tem jaokba ajanga iba tongtipang tebilemtsü koktettsü asoshi nüburtem lungjemer inyakba sayur.



Rüzühkhrie Government Higher Secondary School, Kohima indang NSS Unit educational tour ama May 9, 2025 nü Raj Bhavan, Kohima semdanga liasü. Iba mapang parnoki Nagaland Angh La Ganesan den sensaksem tajung agia Angh ka teinyaksü tajungba nung angateta liasü. Kaketshir nem Nagaland nung yimtenren aser current affair indang asüngdangtsü maongka agüja liasü aser parnok tangazükba jenti angu.

Mokokchung DPDB senden May 14 nü amentsü

Mokokchung, May 09, 2025

(TYO): May ita atema Mokokchung District Planning & Development Board (DPDB) senden 14th May, 2025 nü, anepdang 11:00 ako nungi Deputy Commissioner Conference Hall,

Mokokchung nung amentsü ayonger, anungji, züngsem ajak medema adentsü asoshi Mokokchung DC & DPDB vice chairman, Ajit Kumar Verma, IAS-i sangdong ka ajanga mepishia metetdaksüogo.

Sowa Changle yimtsüing nung apu ka semzüko

Dimapur, Monupii/May 9

(TYO): Mon District nung Sowa Changle yimtsüing kübok Chiyong ayong temdanga tawa lokti-i sung agi yangluba apu ka May 7 nü Longleng Deputy Commissioner W. Manpai Phom (NCS)-i semzüksüogo. Iba apu ya Team LEMSACHENLOK aser Sowa Changle yimdaklirtem longjemer yangluba lir.

Apu takok ngua yangluba atema ajak nem tenüingsang agütsüba mapang W. Manpai Phom (NCS)-i, iba anogo ya Phom aser Konyak nunger atema kanga tongtibang anogo ka lir ta ashi. Paisa, tanü putu nung senzusenpong aser jongdak maparen atema lenmang ajanga tesendaktep tajung alitsüji kanga tongtibang ta ashi.

Paisa, parnok district balala nungi süaka kidanger yimtsüing aser jilatem longjemer inyakba ajanga jongdak tebilemtsütem bentettetsü, ta ashi. Maneni pai, lokti ajangzükdakhtsütsü atema iba amala mapa tajung benoka inyakba atema

L E M S A C H E N L O K mendenbuba aser team leader Dr. Y. Nuklu Phom nem tenüingsang agüja liasü.

Sentong tatsüka agiba mapang Yanger (NPS), Superintendent of Police (SP) of Longleng, and Phom Peoples' Council (PPC) tir Y.B. Angam natia o tatsütsü jembia liasü. Tenapronglai Team LEMSACHENLOK aser Sowa Changle yimdaklirtem nem tenüingsang agütsü.

Kasa mapang nung Dr. Y. Nuklu Phom-i, iba apu semzüka sentong nung shilem agir aser tejaoker ajak dang kanga pelaba lemsatep aser Sowa Changle yimtsüing nung alirtem nem iba apu takok ngua yanglutetba atema tenüingsang agüja liasü. Pai, alima nung tanungba tesemtem overpasses aser flyover balala yanglua renlokyonga aoba mapang parnok aliba tesem nung lokti aika lenmang agi dena junga mesendaktepi lir, ta ashiba den iba apu ajanga iba tesem nung aliba nüburtem koda ajangzüksü iba indang lemastepa liasü.

Iba sentong ya S. Manpong, Village Council Chairman (VCC) lenisüba nung agi aser SCBC pastor Mopa-i Tsüngrem temaotsü meshizüka sarasadem aser Phaknyu Angh-i lokti pela agizükba o jembia liasü.

Kohima nung Maker Market tenzüka lir



Main Town Commercial Complex, Kohima nung aliba Bstudio, Artisan Loft nung May 9, 2025 nü Makers Market nung shilem agir tetsür entrepreneurs tem tangokba noksa ka angur.

Kohima, Monupii/May 09

(TYO): Main Town Commercial Complex, Kohima nung aliba Bstudio, Artisan Loft nung May 8, 2025 nü Makers Market tenzüka lir aser May 10, 2025 tashi alitsü, koba anogoshi anüngdang 12:00 ako nungi nikongdang 5:00 ako tashi lapoker.

Vocal for Local yaria iba sentong ya Bstudio boutique ajanga ayongzü, kong 'locally handmade' oset tem angur.

Iba market nungya tetsür

entrepreneurs 11 lir, aser parnok entrepreneurs shiai handicraft oset, original artwork aser kidang yangluba chiyongtsü tabu balala sayur. Iba market semdang temi item osettsüset yanglur den tsüngtong ajurutepa local businesses tila tem yarir aser parnok sempet angateter.

Iba market nung shilem agitsü nüburtem pelashishia jaoker, kong Mother's Day atema stalls balala nung offers agütsü.



May 09, 2025 nü New Delhi nung Defence Minister, Rajnath Singh-i CDS General Anil Chauhan, Army Chief General Upendra Dwivedi, Navy Chief Admiral Dinesh K Tripathi aser IAF Chief Air Chief Marshal AP Singh nung den senden amendang tangokba noksa nung angur. Kasa noksa nung Defence Secretary, Rajesh Kumar Singh-a angur.

Pakistan nungeri drone 500 amshia India amaktsü merang

New Delhi, Monupii/May 09 (Agencies):

Brihostibar aonung Pakistan nungertemi missiles aser drones aika amshia Jammu region aser Rajasthan amaktsü merang, ajisiüaka Indian defence systems ajanga nokdangteta drones ajak khazüka yok.

Pakistan nung sepaitemi amshiba drones ji karbo Turkey nung yangluba Asisguard Songar UAVs liasü ta jangjaago.

Pakistan nung army temi drone 500 shi India tsütsüleni yok, aser item drones ji Ladakh kübok Siachen base camp nungi Gujarat kübok Kutch area tsüngda tesem 24 nung angu.

Pakistan nung drones 50 shi air defence prangpong ajanga khazüka yok. Drones teimbaka nung tapoktsü maliasü saka tesem balala itdangtsü atema camera keta liasü.

Pakistan sepaitemi drones aser missiles amshiba sülen ghonda shika tsüngda Hokolbarnü Union Home Minister, Amit Shah-i Delhi nung tongti ketdangsertem senden ayongzüka arrtsülen tensa asadangba den külemi linük tesem ajaklen airports nung security akangshitsü telemtetba agiogo.

Amit Shah-i par kidang ayongzüka senden nungji Union Home Secretary Govind Mohan, Director Intelligence Bureau Tapan Deka, Director General Border Security Force (BSF) Daljit Chawdhary, Director General, Central Industrial Security Force (CISF) RS Bhatti aser Bureau of Civil Aviation (BCAS) Director General Rajesh Nirwan nung aden.

Iba senden nungji lenirtemi agency balala tsüngda amalitepa inyaktsü aser security meraksatsü atema asalentong maneni yanglua inyaktsü telemtetba agi.

Kasa senden nungjisa arrtsülen security tashi itshitsü aser linük tesem ajaklen airports nunga security tashi itshitsü telemtetba agi.

Senden nungjisa ketdangsertemi security atema terenemshiba aser tesem balala nung tensa osang Home Minister nem metetdakja liasü.

Brihostibar aonung Pakistan sepaitemi missiles aser drones amshia Jammu region aser Satwari, Samba, RS Pura, Arnia den Jaisalmer densema Rajasthan nung tesem balala

amaktsü meranga liasü.

Hokolbarnep India-Pakistan arrtsülen Jammu Frontier kübok Samba Sector nung India nung sepaitemi kiralongrar tenet kasetogo.

May 8-9 ayaterm nung Dhandhar post nung Pakistan Rangers-i injang yokba mapang nung kiralongrar aika arrtsü adena idaktsütsü merang, ajisiüaka BSF sepaitemi parnok ajak nokdangteta kiralongrar tenetbo kasetba den külemi Pakistan nung post ka raksatsü.

केनरा बैंक Canara Bank

Specialized Asset Recovery Management Branch

2nd Floor, Dee Bee Grande, 6 Mile, Panjabari Road, Guwahati- 781022, Assam

E-mail- cb7259@canarabank.com

Ref: CB/ARMB/7259/10/2025-26

Date: 03.04.2025

To,

Mr. Shiniho Kakheto Jakhalu, S/o Shiniho, Marble and Granite House, Purana Bazar, Kohima Road, Dimpaur, Nagaland- 797112.

Subject : Securitisation and Reconstruction of Financial Assets and Enforcement of Security Interest Act, 2002 nung Section 13 (8) kübok agüja aliba tashi amshia notice agütsür. (Iba nung yagi tenzüka "the Act" ta dang tetshitsü).

Iba Act kübok shimba tsünglanglen sign süa alir Authorized Officer of Canara Bank, ARM Branch, Guwahati, Assam (iba nung yagi tenzüka "the secured creditor" ta tetshitsü)-i iba Act nung Section 13(8) aser SARFAESI Rules nung Rule 8(6) nung ajemdaker ibanotice agütsür:

Secured creditor-i 29.01.2022 anogo nung iba Act nung Section 13(2) kübok borrower/ firm Shiniho Kakheto Jakhalu (name of Borrower/ Mortgage/Guarantor), mortgagor aser guarantors (temalen shia aliba tenüngtem) nem Demand Notice agüja sentsüh Rs.56,23,421.88 (Rupees Fifty Six Lakh Twenty Three Thousand Four Hundred Twenty One and Eighty Eight Paise only) den sen tetemlok ajak notice agütsüba anogo nungi anogo 60 tsüngda agüjang ta tuyua liasü.

Ajisiüaka Borrowers/Firm, mortgagors aser Guarantor (temalen shia aliba tenüngtem)-i temalen shia aliba sentsühji magütsütetba ajanga Authorized Officer-i iba Act nung Section 13(4) nung ajemdaker 07.09.2022 anogo nung agütsüba Possession Notice nung agüja aliba kiojentem agiadokogo. Iba dak alia 10.09.2022 anogotem nung symbolic/ Physical possession notice ji Tir Yimyim (local language Newspaper) aser The Morung Express (Name of English Newspapers) osangkakettem nung sangdonga liasü.

SARFAESI Act, 2002 aser SARFAESI Rules nung Rule 8(6) nung aliba amanenok dang secured creditor ket nungi item kiojen alangzüksü atema tatembangbuba maongka agüja ibanotice agütsüba sülen anogo 30 tsüngda sentsüh 03.04.2025 anogotashi nung adokba Rs. 78,46,286.74 (Rupees Seventy Eight Lakh Forty Six Thousand Two Hundred Eighty Six and Seventy Four Paise only) den interest, costs aser teindokba ajak agütsütsü metetdaksür. Yamaji mesüra iba Act kübok osangkakettem nung sale notice agütsütsü aser item secured assets ji iba yimya nung ayoktsü:

(i) Item ama kiojen shishilemar dang nungi "quotations" meshia mesüra item kiojen alizütsü jangrartem den jembia ayoktsü; mesüra (ii) Public dang nungitenders meshitsü; mesüra (iii) e-auction mode densema public auction; mesüra (iv) Private treaty ajanga ayoktsü.

(ii) Iba Act nung Section 13(8) kübok osangkakettem nung sale notice magütsüdagansa nai item kiojen alangzüksü akok, mesüra mapang süirbo iba Act nung Section 13(8) nung kiojen alangzüksü atema shia aliba nü temedenji makai akümtsü.

Thanking You

Authorised Officer

Jharkhand nung state sorkari doctor tem 'leave' ajak thinentsür



Ranchi, Monupii/May 09

(Agencies): Tang India aser Pakistan na tsüngda raraba ajanga Hokolbarnü Jharkhand nungbo state sorkari sorkar hospital tem nung doctor tem ajak leave thinentsüogo.

Ranchi nung osangbenertem den jembidang state health minister, Ifran Ansari-i, "Tang Health Department kanga kümüküma lir. Tang rara adoka aliba tensa nung ajemdaker rongdak teyari agütsütsü atema onoki sorkar hospital tem nung doctor tem ajak leave thinentsür," ta metetdaksü.

Doctor ajak dang peipei mapa inyakba tesem nung alitsü aser nüngdak dang adokra parnok arrtsülen aliba sülen ano tensa tamajungba tesemtemi yoktsü, ta paisa kümogo.

metetdaksü.

"Rongdak tensa balala atema Health Department renema dang lir, aser state nung aliba hospital nung inyakerkem ajak kümüküma lir," ta paisa metetdaksü.

April 22 nü Pakistan nungi kiralongrartemi Jammu & Kashmir kübok Pahalgam nung nisung 26 kasetba sülen ibaji mangyanga India-i Pakistan aser Pakistan occupied Kashmir (PoK) nung kiralongrar camp 9 amak.

Brihotisbar ayaterm nung Pakistan sepaitemi Leh nungi Sir Creek tsüngda tesem 36 nung drones 300-400 shi yok saka sepaitem ajak khazüka yokba sülen ano tensa tamajungba tesemtemi yoktsü, ta paisa kümogo.

GOVERNMENT OF NAGALAND

OFFICE OF THE DIRECTOR GENERAL HOME GUARDS', CIVIL DEFENCE & STATE DISASTER RESPONSE FORCE

NAGALAND :: KOHIMA

NOTICE

Dated, Kohima the 8th May 2025.

NO.HG/ESTT (A)/3/2021//35 : In pursuance to this department Advertisement No. No.HG/ESSt(A)-3/2021/3293 dated 25th March 2025 for recruitment of 7 (seven) post of Driver under the Department of Home Guards, Civil Defence & SDRF, the Departmental Recruitment Board conducted the Physical Efficiency Test (PET), Medical Fitness Test (MFT), Driving Test and Interview (viva-Voce) w.e.f 29th April 2025 to 8th May 2025.

On the basis of total marks scored by the candidates in the above tests, the Board hereby declares the provisional result of the recruitment examination in order of merit as under:

Sl. No.	Registration slip No.	Chest No.	Remarks
1.	146	097	
2.	27	041	
3.	160	047	
4.	161	099	
5.	166	012	
6.	6	055	BT (Konyak)

2. The post reserved for BT (Phom) is kept as back log and shall be filled in the next recruitment.

3. The waiting list of the following candidates is valid for 6 (six) months with effect from 9th May 2025:

Sl. No.	Registration slip No.	Chest No.
1.	38	033
2.	225	017
3.	252	102

4. The candidates are instructed to submit their acceptance or non acceptance letter in the Directorate of the Home Guards', Civil Defence & State Disaster Response force, Nagaland, Kohima on or before 15th May 2025.

Sd/-

(RENCHAMOP. KIKON) IPS,

Director General

GOVERNMENT OF NAGALAND

STATE COUNCIL OF EDUCATIONAL RESEARCH AND TRAINING

NAGALAND: KOHIMA

NO.SCERT/DIET/APPTT-2/2024/

Dated Kohima the May 2025

NOTIFICATION

In pursuance to the Department's Advertisement NO.SCERT/DIET/APPTT-2//2024/ 186 dated 4thMarch 2025, based on the marks obtained in the Written Examination and Oral Interview, the following candidates are hereby recommended under the following terms and conditions:

1. The posts are temporary and co-terminus with the scheme. Hence, does not confer any right to claim for absorption/regularization of service at any point of time.

2. The tenure of engagement will be for a period of 1(one) year subjected to extension provided the scheme continues.

3. The candidate/Lecturers will be posted in any of the DIETs in the State. Transfer/Posting will be the prerogative of the Department.

4. The posts are under Centrally Sponsored Scheme (CSS) under Samagra Shiksha, Ministry of Education, Government of India.

5. Release of Salary will depend on the release of funds from Government of India (GOI).

6. The waiting list shall remain valid for a period of 3 (three) months from the date of declaration of the result.

1. Subject: HISTORY

Sl.No	Name	Roll No.	Remarks
1.	Ms. Grace K. Semy	HSY25011	Selected
2.	Ms. A Pongme Konyak	HSY25001	Waiting list

2. Subject: LINGUISTICS

Sl.No	Name	Roll No.	Remarks
1.	Mr. Tsachumse H Sangtam (BT)	LNG25076	Selected
2.	Ms. H Eyam Konyak	LNG25055	Waiting list

3. Subject: MATHEMATICS

Sl.No	Name	Roll No.	Remarks
1.	Mr. Khruvotso Kiso	MTH25090	Selected
2.	Ms. Imlisenla	MTH25087	Waiting list

4. Subject: PSYCHOLOGY

Sl.No	Name	Roll No.	Remarks
1.	Ms. Renemliila	PSY25081	Selected
2.	Ms. Kelengonu Thakro	PSY25079	Waiting list

All the recommended Candidates must submit their acceptance letter to the office of the undersigned within 7(seven) days with effect from the date of this notification. Failing to submit the same shall be treated as non-acceptance and the same post shall be allotted to the Candidates in the Waiting List.

(KEVIRALE-Ü KERHUO)

Director,

SCERT : Nagaland, Kohima



TIR YIMYIM YIMOBILEM (EDITORIAL)

DIMAPUR

KÜPTOKNÜ

MONUPII 10, 2025

Benjong Tajungtiba

Tanü asüng Nagaland nung aluyimertemi züsentetba aonsutsü aser süngjanglijang benjong amongtsüsa aluyimertemi inyaktetba ya Nagaland government asoshi dena nümadangtetsü mapa tajung ka lir. Alima nung tangar kintem den pei kolok agi toktepa nisungtem asoshi nüngdakba mozü mesüra osettsüsettem yanglutetbaja pei kin asoshi takok tulu asütsü. Kasaji, tanü ama kin o kin na raratsüsa akümdanga, tangar akoktsüsa peisasa raraba osettem yangluteta renema akabaja kin ka asoshi kanga tenüngdaksü mapa ka lir. Ajisüaka, alima nung nisungtem nüngdak kechisarina purapiteta yanglutetba ajakji aluyimertemi alu meranga inyakba nungi züsentetba chiyongtsü chiyonga inyakba agiang inyaktetba mapatem lir ta asenoki mamatsüla. Ibaji mangatet ser asenok aikati aluyimertem ya sensaker aser mazüng-mashiba purtem amai bilema mezüngmeshir, ibaji asenoki asen tetsü tasola mezüngmeshir amato lir. Itemji kodang asenoki angatetdir, asenoki aluyimertem nemsä akhüma tuluba agütsütsü aser asenokia aluyimnüa aittsü. Aji oda, asen Ao lima nunga tanü putu nung Aliba yimtak alimai meteta züngi benjong amongtsüsa Aliba nung aluyimertemi inyaktetbaji asenok ajak asoshi tepelatsü mapa ka lir. Atangji, Nagaland nungsa tawa Khonoma yimtak lasüng benjong amongba asenoki angashiogo aser ano Jakhama nunga aloo benjong amongtsü ayongzükba osanga asenoki angazükogo. Aji oda, Thanamir nung metoklashi (apple) benjong amonger aser ano Angami aser Chakhesang lima nung chuba mersü benjong amonger. Item jagi alimai Nagaland meteter aser Nagaland nung alirtema aluyimba mapa nung ajungshiteper. Atangji, asen Ao lima nung asenok ajak nümadangtetsüsa aluyimertemi züsentetba rongnung, ano, Longkhum nungertemi bengana züsentetba takok ya ka asütsü. Aji oda, ano tang nungi asentenshir asen lima nungsa tesem ka nung züngi benjong, ano ka nung bengana benjong, ano tesem ka nungbo süngmok benjong, mersü benjong, menti aser manü benjong, ano tesem kar nungbo aluyimertemi pei awatsüng nungi metsütetba ango benjong ta ita shia amato aluyimertemi züsentetbatem alima dang sayua pelatepa ayokba benjong amongtsü bilema aluyimba putu tasen ka tenzüksüsbaji kanga nüngdaka kümogo. Asenok Naga nungertemi mapa meranga inyaker benjong monga pelateptsüsbaji kanga jangrar. Ibayongji, asenoka tang tashi Moatsü aser Tsüngremmung banjongbo kanga jangrabangraa amunger. Ajisüaka, akhi mapang benjong amongba den tanü amongba benjong tepilaji, akhi mapangbo benjong ajak ya aluyimba benjong liasü saka tanü asüngbo kibong teimbakati alu mayimer, anungji tanü asenoki Moatsü aser Tsüngremmong amongba benjongtem yabo akhi tsüraburtemi amongba benjongbentsütem bilemteta amonger amai amonger. Iba jagi telok kari yimkong külemi amongtsüsa benjong sentong ka mayongzükra kibongtem nungbo aikati sobaliba benjongtem yabo mamong süidaktsür. Ibaji benjong memongnüba agi masü saka alu mayimba ajanga benjong amongtsüsbaji mapet akümer. Aji oda, asenoka alima nung kin ka, saka alua mayim aser benjonga mamongba kin kuma ao nungbo asenok ajurutepdak mali pilatsü aser asenok kati ka memetetepi samatsü. Ashiko, asen lima nung tanü asüng putu yimya den apet tenzükbä benjongbentsü amongba agi benjong ya chiyonga-jema ken tena aser tsüngsanga pelatepba mapang ka dang ashi, mapa inyaker amongba benjonga tabo mangateti alitsü südi. Aji oda, benjong monger tananü nungibo ano alu mapa tenzüksü ta khuretsa nisungtem mulungjang nung kenyongi mebilemer. Asenoki memeteti asenok shisamar tesamalen aoba lenmangji aji ka asütsü. Iba jagi asenok aoksadaktsütsüla aser nüchi mulungsentsü dangi shia arur küm shia mapang telatet kasa nung Moatsü, Tsüngremmung aser Christmas amongba ama, joko asenoka küm shia kasa ita aser kasa anogo nung asenoki alu nungi züsentetba chiyongtsü tapu balala indang benjong among tenzüksüla, iba kisüng jagi asenok aluyimba nung asentenshitsü aser itemjiang tetezü aser tajangzük aketba tanü putu tasen nung among tenzükbä benjong asütsü.

OLEMSABANG

Asenoki meyokteba jembiba Ojang karh

T. Meren Paul, Kohima

(Yashi adok nungi...)

31. Yokya sonu- Kirtsüng nung süngkum tongnü, saradong kisü jensütsü atema inyakteta wateta ayuba
Yokya lim- Alushi yim nungi pelar süngkum tongnü wazüka ayuba
32. Arukoshi-Takaba, taliba ajak bendena agiba
Monuhshi-Dokshidoklem, tanük tari ajak anepalua shidenba, bendenba
33. Sempa- Maginüba, majinüba, mesaklokba
Metsükmokong- Temulungi, shi azüi tenoka magizüktetba
34. Mapang-Jungdak, tang ajuruba tensa
Mongpu- Küm shia tataktet yimya mapang bener aruba
Tsüngkum - Asükwa mapang; shiruru dem tenarong metsüba mapang,(animal mating season)
35. Moamoji- Meyimlaba memeteti temoatsü aruba
Teremra- Nisung karbo arem yadai aodang teti moamoji asüba
36. Züdok- Mengujem, mayimjem mebilemteti mezüngokba
Rhüdok-Shimzüka doktsüba, paidokba, endokba
37. Amokmeren- Tashi sayua amokbanga merenba, threaten
Merahmeten-Tsübodakja ola tashi agi asaloktsüba, intimidation
38. Chishimashi- Kolen timlen, tejaklen asü tesülenar mebendangtet, mereprangtet
Mashikoshi- Timlen mesüi beintepa mashileni tajichi indang tabilen enokba
39. Süngkensüngra- Chiyongtsü kar achitsü tebangi, temulungi magizüktetba, ashibangba
Tebu azü- Chinüyongnü yonga tangar kidangbo mechinür ta kecha agizüka machiba
40. Senmen- Aniasünger teburi tetsür laer tsürapur nem sempet agutsüba
Putisü- Yim kati ka nem tebuja talang agutsüba, tamakoker takoker nem talang agutsüba
41. Bangnem- Shi telong tila ka, tebang nung ken anemtsü
Shijeb- Shi temelang ka, ken aon soshia
42. Jakrepchi- Tanur ana kulemi asoba, twin
Pangrep-Süngjang ana menatepa adangba, tanur ana menateper asoba, Siamese twin
43. Yartsüngsang-Asem tema jokshishia tsüngsangba
Tsüngkang-Yartsüngsang tapu palala tenüng, tat Tenem kazü
44. Asemtep- Shiba tekaraba ta asemtepba
Arshishitep- Nisung ka meneptsü arishia asemba
45. Tonglong- Ninang tesepe nung entsü nungi reteta temang kümtetba mapang
Jongjakrep- Ninang tonglong nungi tashikang tentettsü tenzükbä mapang
46. Kolukodem-Tangar jilu shia jembia temenünütsü inyakba.
Tahtahperen - O mereptet, tetzü makaba jembidenba,
47. Teronem- Teyangluba temenemtsü tajung adokdaktsüba, perfume
Tesanem- Yimya nungi pa sahsa pa dak nungi adokdaktsüba temenemtsü tajung, aroma
48. Teshinem- Taküm sangnu tasü shizüka aodang tashi menemba
Tezüknem- Pa sahsaa yimya nungi mejungi menema adokba, tat- waka sünem
49. Nükten- Tenük sümoremer reprangzüka yokba,
Rangdaknükpok- Indangindanga masü sayepleni tenükpereper reprangba, cock eyed
50. Yanglutet- Maka asüba oset ka mezüng yanglutetba, invention
Ngutet- Shingai memetet aser mangu aliba mezüng anguba, discovery
Mejem- Ken, sangro tasen yangluba, compose
Nemtet - Lenmang maka arem ajemboka aoba, tabiji agi ao nung lenmang ajuruba
Pura/Purapuji- Shidak tatalokba masü saka teyangluba otsü, timyim masü, fiction
51. Nüknarier-Tebur/tetsür, Ayier asangur tajenütep, meritep nüksakasakba
Temeraher- Nisung kati tangar ka junga apayua, aginüa tushia reprangba
52. Angko majung-Arem yatai aodang moamoji masüba, kecha temoatsü bena maruba
Yazü majung- Inyaksangshi nung tashi mait, süngsang majet, tangar memenep
53. Jilushi- Tangari inyakba aser jembiba tangzüka jilu yia inyakaba,
Ola shio-Tebangeri jembiba olaosü shidak adoka pa mesüka jembiba, mimicry

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Doulos Theological College pur 11buba Convocation agiogo

Dimapur, Monupii/May 09 (TYO): May 08, 2025 nü Viola Colony, Dimapur nung Doulos Theological College 11buba Convocation sentong agiogo; iba sentong nung graduate asür Laishir 18 nem degrees agütsü. Iba sentong ya Asst. Professor, Mulato T. Kiho leniba nung agi. Rev. Toshi Longchar-i lokti pelaa agizükba o jembiba den külemi tajungshi o jembi. Kasa sentong nung tongti o jembirji Regional Consultant for South Asia, American Baptist Churches International Ministries (ABCIM), Rev. Taku Longkumer liasü. Ministry aser mission mapa nung aika ajangshia aruba

lemsatepa Rev. Longkumer-i graduate tem den Tsüngrem tenzükba, Tsüngremi tenyaba wadang inyakba aser tanü putu nung lenla ajungalen nungi tenzüchtsü rongdak nüngdakba indang lemsatep. Sentong nungsa Kr. Watijongla Jamir (Academic Dean), Dr. Onen Jamir (President), Rev. Dr. Nuklu Longkumer (Principal) aser Wt. Likingla (Administrator) nungeri graduates nem degrees aser certificates agütsü. Iba sentong nung Mantong Phom aser Wapangsangla na Marshals liasü aser graduating class tenüng nungi Phenwang Konyak aser Yimyarenla nati

tepila o jembi. Tenatisa tesayurtem, staff tem aser tsüraburtem dang pelaba lemsatep. 11buba Convocation ya shisaliok dak sendakba sentong ka dang masü saka Tsüngremi meimba, college-i theological shisaliok agütsüba aser laishirtemi Arogo aser loktiliba tenzüchtsü atema bendanga agütsüba temaitsü ka liasü. Tang graduate asür laishirtem tenzükba wadang balala nung ajemokdang Doulos Theological College-i parnok tenzükba wadang atema maneni sarasademtsür, ta Doulos Theological College nung Academic Dean, Watijongla Jamir-i metetdaksü.

May 16 nü Kohima nung Tech4Church 2025 Conference agitsü

Kohima, May 09 (TYO): Tabernacle Technologies-i May 16 nü Kohima nung anogo ka Arogo aser technology conference 'Tech4Church' ayongzüka agitsü; iba sentong ya Tsüngrem tenzükba wadang nung inyaktertem aser media teams, Arogo nung accountants aser secretaries atema lir. Iba sentong nung Arogo nung tenzükertemi Arogo ministry balala nung technology teyari agia temelenshi adokdaksüba angazüchtsü. Iba sentong ya Hokolbarnü, May 16, 2025 anepdang 9:00 ako nungi nikongdang 3:00 ako tashi Capital Convention Centre, Kohima nung agitsü. "Embracing the Digital Shift" omen nung ajemdaker ayongzüka conference nung montintemi tongibang onüktem aika jembitsü, practical workshops aser shisa lemsatepba sentongtem agitsü. Conference nung shilem

agirtemi tenzükba wadang balala nung technology ajanga wadang tajungba takok ngua inyaktettsü, financial aser legal inyakyim tajungba inyaktettsü aser tanü digital putu nung technology teyari ajanga Arogo inyakyim tajungba akümba angazüchtsü. Iba conference ya Tabernacle Technologies-i Our Daily Bread Ministries (content partner), Highland Dawn Media (HDM) (platinum sponsor) aser Megavoice (associate sponsor) den senteper ayongzüker. Tech4Church Forum nung mongintemi tanü putu nung Arogo dak apetba tongtibang onüktem aika jembitsü. Ashvin Dhyriam (Co-Founder & Managing Director of GoodNews Group)-i "Technology and the Church: Global Innovations and the Path Ahead" onük jembitsü, Nongothung Jungio, IRS (Commissioner of Income Tax

(Admin & TPS), North Eastern Region, Guwahati aser Imlimeren Jamir, IRS (Commissioner of Income Tax (Appeals), Jorhat nati Arogotem atema sorkar compliances aser legal nüngdak balala indang jembitsü. Christian Media Strategist aser Highland Dawn Media nung Director, Wabang Moa-i 'Digital Media for Effective Church Ministry' aser Excellogics Tech Solutions Pvt. Ltd. nung Senior Project Manager, Debashis Sen-i Cybersecurity & Internet Safety indang jembitsü. Tejangrartemi May 13 anogo tashi nungbo www.tech4church.in. ajanga tenüng agütsütsüla, mezüngpurtem nem tama yimli agütsütsü. E m a i l office@tech4church.in, aser Con: 88-6086-3800 ajanga osang tejangja metetpelatsü akok.

ANOGO ABEN TSÜNGREM DEN

Kibuba tashi nung amangdi

"Kibuba tenüngji tashi tait mitsa; temeshipur ajagi asüma ayir aser kümzüka alir." A.Shin 18:10

Alemli otsüla-oboula nunger mapang yim ka tsükchir ket nungi kümzüka yutettsü atema yimti tezülen mesüra süngküm anasa mitsa yanglur idakji mitertemi tsükchir arur marur repranga yimtiji nüka ataa liasü, iba jagi yimti nüburtem yimmaker lendong nungi aiben kümzüka aru. Amangbapur ka asoshi pei miim (secret) tamang kümzüka ayudaki Kibuba tashi tait mitsa akümpokji lir. Tamanger ka shibai pei tamang Kibuba tashi nung teti metaloker aser Kibuba tashi angutsü meita alir pa/laji temoatsü. Tamajungbai pa kodanga mesemdangtsü mesüra pa/la anema marutsü kechiyong Kibuba tashi nung parnok teti kümzüka lir.

Dawid ya Tsüngrem dak mulung toka amanger ka liasü, kechiaser pai pa tamangba tashiji pa yanglusang nungi dang angur ta taküm nung jangja meteta ali, yongji pai "Kibuba kü long, aser kü mitsa, aser kü kümzükba; kü Tsüngrem, kü lung, shiba dak ni jenoker. Pa kü jong, ni kümzükba jangzü, kü tashi tait mitsa" ta Kibuba indang jembiba kuli angur. Dawid ama amanger ka yimya nung Tsüngremi asen taküm nung anogoshi teyari mapatem inyakba indang shisadanga Pa nüngsangba nung anogo süitema yoktetba tamanger ka na aser ni südi.

SARASADEM

Oh Tsüngrem, tanü anogoa ne tashi tait mitsa nungi mepilai kümzüka litetba amangbapur ka asütsü kü nem tangatetba tashi kua. Amen

America nunger rongnungi Robert Prevost mezüngbuba Pope kümogo



Vatican, May 09, 2025 (Agencies): America nungertem rongnungi Robert Prevost mezüngbuba Pope kümogo; pa dang Pope Leo XIV ajatsü. Prevost ya Chicago nung aso aser Peru nung küm 15 tashi missionary inyaka liasü. Pai Latin America aser US

naprongla nung tenzükogo. Prevost ya pastoral care tsütsülen mongin dang masü saka legal tsütsülen-a mongin. Alima nung Catholic Arogo nung Pope 267bubaji pa asütsü. Pa 1955 küm Chicago nung aso aser Pope menden tashi atuba ajanga otsü tasen ka tenzüchtsü. Arrshi küm 69 asüdang pa

Pope shimogo. Pai küm aika missionary mapa inyaka arudang pai aika ajangshiba ajanga Pope shilem inyaksü atema pa temsüa kümogo ta bilemer. Prevost lanuwa asüdang nungi Tsüngrem nem bendanga agütsüba taküm ka lir. Pa lanuwa nungi shisaliok aser tanela naprongla nung tetangshi liasü aser pai par lima nung dang masü saka alima tesem ajaklen nüburtem tenzükba ajanga Catholic Arogo nung tongti akümtsü atema tamendakdak jenjang alangteta liasü. Pa Peru nung küm aika missionary inyaka aruba sülen tesülen bishop aküm. Robert Prevost ya tamalen Archdiocese of Chicago nung tongti putir inyak. 2023 küm nungi pa Vatican nung Latin America atema Pontifical Commission inyak. Iba menden anguba ajanga pai Latin America nungertem den tesendaktep tajungba aküm aser

iba region nungji Arogo dak sendakba tebilemtsü balala atema pai inyaka liasü. Pai Pope Francis den kanga atongtepa inyakba ajanga pai Arogo dak sendakba tongtibang tebilemtsü onük balala bentettsü atema aika angazük. Taküm February ita nung pa Cardinal-Bishop shima liasü, aser ibaji ajanga pai Pope menden ajangzüktettsüsa pa jenjang ano tajungba aküm. Pa ya kanga teshisadang aliba lenir ka lir; ibaji ajanga Pope tasen shimba election nung aikati Pope menden atema pa pusema liasü. Robert Prevost, Pope Leo XIV shimba ya alima nung Catholic Church atema kanga tongtibang mapang ka asütsü. America nungertem rongnungi mezüngbuba Pope ka ama pai sobaliba aser region nung ajemdaker telemsa adoka aliba tsüngda apu latsütsü atema inyaksü aser alima nung Catholic Khristantem ajak

züngoka inyaksangshitsü. Tawa Pope Francis süadokba sülen Pope tasenba shimtsü atema May 7 anogo nungi Cardinal tem senden tenzüka liasü. May 7 nü Sistine Chapel nung senden tenzük aser iba senden nungji alima tesem balala nungi cardinal 130 dak tali aden. Taoba Pope Francis den tatembangbuba asüpila sentong April 26 nü agia liasü. May 7 nü St Peter's Tenla kidang Cardinal tem tekülem sentong agi, iba sülen vote agütsütsü temsüa alirtem Sistine Chapel nung adenshia vote agütsüba inyakyim tenzüka liasü. Tesüiba anogo ishika Sistine Chapel kima alirtemi mokoziü aodak 'chimney' nungi mokoziü adokba repranga liasü; mokoziüji tanak süra vote maneni agütsütsü aser mokoziüji kodang temesüng südir iba tetezü Pope tasenba shimogo ta temalen alirtemi meteter.

AO OSHI ANGAZÜKDAK:
TANÜ ANGAZÜKTSÜBA OJANG



Tir Yimyim

Temok

- (v) tsüraburi tanur tali meimba agi ngajadaktsüba (pampered)
* Tsüraburi tali temok, anungji tanuri ki mapaa meinyaker.

Temokok

- (n) tetsüng temin aser tepi na tsüngda kokteta aliba teret (knee)
* Onoki temokok agi ali nung tsüketer sarasadem.

OLONG PAITEP # 7146

1		2		3			4		
5									
					6			7	
		8							
		9						10	
	11								12
			13		14	15			
16									
					17				
18									

TIPIEN

3. Nükjidong
5. Rong tulu ka
6. Tebilemba
8. _____ long
9. Tembar
14. _____ shin
16. Ajak wara
17. Temeshi tentet
18. Teyari o (kaketa nung)

LANGTSÜNGLEN

1. Zülujang
2. Lemzüksüba
3. Tekong sobutsü
4. Tarak
7. Tzüma nung senzüba ka
10. Timba aküm
11. Meshidak
12. Yong-i atakba oset ka
13. _____ shiruru
15. Mechinüi aküm

OLONG PAITEP # 7145 TELANGZÜBA

TIPIEN :

1. Sayu, 3. Petinu, 6. Zünga,
7. Menden, 10. Kishi
13. Injung, 14. Tarak,
15. Bangji, 16. Tain.

LANGTSÜNGLEN :

1. Senmang, 2. Yimnü,
4. Tsüngi, 5. Nogo, 8. Nashi,
9. Lungben, 10. Korang,
11. Lumia, 12. Tara.

NAI-A YA METETTER MA



Republic of Ireland nungi Megan Campbell-i "longest ever throw-in by a female footballer" otsü yangluogo. London City Lionesses asayar Campbell-i 37.55 metres ontetba ajanga Guinness World Record ajatetogo. Iba atema original record ji 35 metres liasü saka Megan Campbell-i metre 2 agi talangba onteta otsü tasen yanglu.

Tripura Congress-i 'Jai Hind Tiranga Rally' ayonga agi



Agartala, May 9, 2025 (Agencies): Tripura Pradesh Congress Committee (TPCC) züngsentemi Hokolbarnü "Jai Hind Tiranga Rally" tulu ka ayongzüka agiogo.

Indian armed forces-i Indian armed forces nung kiralongrar teseptem amakba atema tenüngsang agüja parnoki iba sentong ayonga agi. Iba sentong ya Agartala yimti tiyong süia agi.

"April 22 nü kiralongrartemi

Kashmir kübok Pahalgam nung taimaketba tourist tem amak" ta Tripura Pradesh Congress Committee President Asish Kumar Saha-i ashi.

"Iba ajanga linük ajak aoksadaksü. Iba atema nübortemi sorkar aser Indian armed forces dang kiralongrar teloktem nem telangzüba tajung agütsütsü ajungmeso" ta pai ashi.

"Tesüiba anogo ana tashi Indian forces-i Pakistan nung

kiralongrartem tesem aser teseptem amaker. Ibaji dang masü saka Pakistan-i tayang küpzüksü aliba atema telangzüba agütüsogo" ta Saha-isa ashi.

Indian National Congress-i Indian armed forces den külemi noktaker. Onoki Indian armed forces nem tenüngsang agütsür aser iba tenüng nung Jai Hind Tiranga Rally ka agir ta paisa metetdaksü.

Assam kübok Dhakuakhana nung Phaato Bihu athir

North Lakhimpur, May 9, 2025 (Agencies): Assam kübok Dhakuakhana nung 2025 Phaato Bihu organizing committee-i linük nung tensa dak rangloker benjung mamungtsü lemtetogo.

Dhakuakhana kübok

Mohghuli Chaporim nung osangbener den jembidang organizing committee president Basanta Saikia-i iba osang lemsatep.

"Assam Chief Minister Himanta Biswa Sarma-i Assam nung May 10 matongdang Bihu

benjung ajak amungtsü ayongzüka nung ajemdaker onoki benjung mamungtsü lemtet" ta Saikia-i ashi.

Phaato Bihu benjungmung ya tanü nungi tenzüker May 11 tashi anogo asemnü amungtsüba sentong liasü ta paisa ashi.

Tripura nung Bangladeshi nunger 12 tashi apu



Agartala, May 9, 2025 (Agencies): Tripura nung taoba ghonda 24 tsüngda Bangladesh nunger 12 tashi puogo. Indo-Pakistan arrtsülen tensa mejungi aliba mapang ka security maparen akangshiba sülen Bangladesh nunger apu.

Agartala kübok Lichubagan tesem nung police-i night patrol senzüdang nisung ka dak temulung melemi bilema sot. Pa dang asüngdangya asüdang pa Litan Miah aser Bangladesh nunger ka ta langzü. Pa ket nung travel

documents melii India telungi aitba liasü aser pa tepuokdak yua lir.

Sabroom subdivision kübok Krishnanagar Gram Panchayat nung alirtemi Hokolbarnü Bangladeshi nunger 11 apu.

Parnok rongnung tebur asem, tetsür pezü aser tanur 4 densema lir aser parnok ka nisung shinga maliba ki ka nung jenoka liasü.

Iba tesem nung alirtemi parnok dak temulung melemi bilem aser ki meketbangba sülen ketdangsürtem nem osang sangoktsü. Border Security

Force (BSF) aser state police tesem tonga oa parnok ajak apu.

Parnok ya Gujarat nungi Tripura-i aruba liasü aser parnok ya Bangladesh-i aotsü sentong liasü ta angazükogo.

Chief Minister Manik Saha-i Hokolbarnü par kidang high-level security senden ka ayonga amen.

Iba senden nung BSF, Assam Rifles, aser intelligence agencies balala nungi ketdangsürtem aden aser international border nung security akangshitsü indang jembitep.

Onoki Sudan paramilitaries nem China-i yangluba hadir magütsü: UAE

Abu Dhabi, Monupii/May 09 (Agencies): United Arab Emirates (UAE) ajanga paramilitary Rapid Support Forces (RSF) nem China nung yangluba nok-nü magütsü ta shiogo, shirnok Sudan indang mitkar sorkar den rara tesashi tenzüka lir.

UAE indang assistant minister for security and military affairs, Salem Aljaberi-i Hokulbarnü social media nung ashiba agi, iba tai tongloktüba ya Amnesty International report yakünü sayaba nung keta lir aser item ya tamenda dak maka aser kuli tejangja mali.

United Nations, Unites States aser NGOs densema parnoki RSF nem nok-nü agütsür ta aitsüba Abu Dhabi-i mapang talangka nungi magizüki arur.

"Sudan nung tang rara tenzüka alidak densema aliba party nem nok-nü agütsür ta ashiba UAE-i khenyongi magizüker," ta Aljaberi-i ashiba sangdong ya Ministry of Foreign Affairs ajanga X nung lemsatepa liasü.

Khartoum aser Darfur nung amakdang RSF fighters temi Chines GB50A guided bombs aser 155mm AH-4 howitzers amshiba footage tejangja lir, ta Amnesty ajanga Brehostibarnü shia liasü.

Stockholm International Peace Research Institute nungi data athishia, China dang howitzer aliba tejangja meteta alibaji UAE ya dang lir ta rights group ajanga ashir.

Ajisüaka Aljaberi-i iba report aitsü aser iba weapon system ya international market nung küm 10 jungnüa angur aser ibai UAE kisüng atema masü, ta ashi. Iba report yagi lenmang mashi leni anisar ta pai ashi.

RAF temi asendenshir army kübok aliba tesemtem nung long-range drones amshia amaker.

Linük anüdoklen Port Sudan yimti nung tali amak aser iba yimti nung Hokulbarnü agi anogo trong tanen makai amaker.

Iba mapang linük nung tang tashi lapoka aliba international airport ka dang aliba nunga tongtipang ki o jen raksatsü,

totzü rizünga ayuba tesem tulutiba aser main power station raksatsü, ta tenük kuli alirtemi shia liasü.

Sudan nung rara ajanga nisung meyirijang aika tepsetogo aser nisung million 13 dak tema pei ki yutsür tesem balala nung jenshia alima nung humanitarian crisis tamajungtiba adok ta UN ajanga ashir.

UAE-i linük sovereignty

nung aibelena RSF yarir, ta Sudan indang Defence Minister Yassin I b r a h i m - i Mongulbarnü aitsü aser military sorkari parnok den t e s e n d a k t e p r a k d a n g t s ü sangdong.

Y a n g j i telangzüba agüja Abu Dhabi-i nok-nü magütsür ta ashi aser Sudan nung alimai agizüka aliba sorkar ya tejangja masü ta ashi.

Russia nung Victory Day mungogo, Xi o Putin na külemi nokdak

Moscow, Monupii/May 09 (Agencies): Red Square nung Vladimir Putin-i anir Russia indang Victory Day mungogo aser Ukraine-i Russia yimtiba maker anogo ishika lir security akangshia liasü.

Russia-i World War II indang lessons bilemteter ta Putin-i sepai meyirijang aika aser linük 20 dak tema nungi lenirtem dang ashi, kong China Tir Xi Jinping dena liasü.

Putin-i iba sentong nung jembidang World War II ya tanü Ukraine nung tashi ajak amshia amakba den sendaktepa liasü aser iba "special military operation" nung Russia nunger ajak dena lir ta ashi, koba küm pezü buba nung ayaoka otar.

Victory Day parade nung tang mezüngbuba combat drones balala bena aliba trucks tem shilem agia liasü, kechiaser parnoki iba ya Ukraine nung kanga amshir.

Iba anogomung 80 buba den indangtepa Russia-i par sasa anogo asem ceasefire sangdonga liasü, koba "theatrical show" ka lir ta Ukraine-i magizük.

Kyiv-i iba truce ya asayamenü ka lir ta ashir aser Bodhbar aonung nungi iba ceasefire tenzüker Russia-i meyirijang aiben amak ta tai tongloktüsür. Russia-i ceasefire nung lir ta ashir aser Ukraine-i noklang aiben aibelen ta tai tongloktüsür.

Ceasefire tenzüksü ghonda ishika lia Ukraine-i drone amshia amakba yong Russia nung airport shibang aser air passengers meyirijang dak tema timtem ajurua liasü.

Soviet Union-i Nazi Germany madak takok anguba Russia nung amungdang Hokulbarnü Moscow tiyong nung security tesashi yoka tenokdangba balala agüja liasü.

Putin-i mejembidang aser minute ka süngjema malidang ground troops commander Oleg Salyukov-i Red Square telungi sepai 11,000 anir ait aser yangji Ukraine nung rarar 1,500 shi liasü. Iba sülen parnok ya Defence Minister Andrei Belousov-i semdanga liasü.

Russia ya Nazism, Russophobia, antisemitism anema raksatsü makokba linük ka liasü aser alitsü, ta Putin-i nenshia ashi. Russia leniri aiben aser tiazü nung Ukraine lenir ya Nazi nunger ama athishia jembir.

"Ochi aser justice asen tsütsü lir. Linük, lokti tentet aser nübur ajungai Ukraine rara nung shilem agir bhukumer," ta pai ashi.

Russia-i iba sentong nung linük balala nungi lenir 27 aden ta ashir, saka Putin den külemi China lenir aliba aser Red Square nung China nunger sepai 100 dak tema jajaba ang kanga jangja liasü.

Anüdoklen Russia-i tongti shilem agiba temaitsü North Korea, Vietnam aser Mongolia nungi military contingents dena liasü.

(Maneni tapak 8 nung...)

Ministry of Development of North Eastern Region
Jodhpur Officers Hostel, Pandara Park, India Gate
New Delhi - 110003

Project Quality Monitors (PQM) shimtsü atema sangdonger

NE States nung MDoNER indang scheme balala kübok inyakba Monitoring of Infrastructure Projects atema Project Quality Monitors (PQMs) shimtsü Ministry of DoNER, Govt. of India tebilemba lir.

Qualification: Tejangja University nungi Civil Engineering nung graduate.

Eligibility Criteria: Candidate ya Superintending Engineer level nungi anisüngzüker alir mesüra Government organization, Central/State Public Sector Undertaking (PSU) mesüra parnok indang subordinate offices nungi Superintending Engineer ama tajemba agi küm ka inyakker alitsüla. Ajisüaka candidates shirnok Executive engineer dang tekübokba masüba level nungi anisüngzüker mesüra Government organization nung Executive Engineer ama tajemba agi küm pongu inyakdang alirtem temsütsü. Government engineering colleges/IITs/NITs, etc nung teinyakdak aser anisüngzüker aliba tesayur shirnok lenmang aser ki o jen yangluba nung inyakdanga ali, parnokia apply sütettsü.

Age limit: Application agütsüba anogo arishi küm 65 tekübok asütsüla.

PQMs shimtsü aser remuneration indang tejangja <https://mdoner.gov.in/activities/Pqm-and-Tpti> nung angutsü.

Website nung agüja aliba format ama CV meyongnem agütsür hard copy den danga nungdakba documents tem 'GM, A&C Department, NEDFI H.O., G.S. Road, Guwahati, Assam-781006' tongtsütsüla. Kasa soft copy ya advisory@nedfi.com aser inframdoner@gov.in nung yoktsüla. Osang tali tejangjaba metetner temi Tel: **+91 361 2222200** nung tongteprateptsü akok.

CBC 11101/11/0001/2526

PELABA LEMSATEPER

Medemyim Senso Mungdang ajanga ayongzüka 1st & 2nd May, 2025 anogo ana nü Moatsümong benjung "Sobaliba Asüingsashi" Omen nung ajemdaker kanga longsoa amongba den Mokokchung yimtiba nungi Aosüngkum Cultural Club ajanga asen.Aor sobaliba kenten aser yar tsüngsang tesayuba agüja tangzüka tulu ngua liasü.

Medemyim sensosanger ajaki clubpur dang kanga pelaba lemsateper. Nenok mapa tajung ozü yimti nüburi teti bilemtettsü.

Sd/-
Imsuangshi Jamir
Chairman, MSM

Sd/-
T. Wapang Imchen
Secretary, MSM

JAAP-PG
2025
<https://jaappg.admissions.nic.in>

School of Planning and Architecture, New Delhi | Bhopal | Vijayawada
Institutions of National Importance under the SPA Act 2014 established by
Ministry of Education, Government of India

JOINT ADMISSION FOR ARCHITECTURE AND PLANNING - POST GRADUATE (JAAP-PG) 2025

Applications are invited for admission to various postgraduate degree courses at three Institutions, namely; School of Planning and Architecture; New Delhi, School of Planning and Architecture, Bhopal and School of Planning and Architecture, Vijayawada, for the Academic Session 2025-26 as under:

Postgraduate Degree Courses at three SPAs	Seat Matrix for SPAs		
	Delhi	Bhopal	Vijayawada
Master of Architecture (Architectural Conservation)	25	25	20
Master of Architecture (Landscape Architecture)	29	25	25
Master of Architecture (Urban Design)	25	25	25
Master of Architecture (Sustainable Architecture)	-	-	35
Master of Building Engineering and Management	39	25	35
Master of Design (Industrial Design)** Or Master of Design* **at SPAD and SPAB *at SPAV	29	25	25
Master of Planning (Environmental Planning) ** Or Master of Planning (Environmental Planning and Management)* **at SPAD and SPAB *at SPAV	25	25	25
Master of Planning (Regional Planning)	25	-	-
Master of Planning (Urban and Regional Planning)	-	38	40
Master of Planning (Transport Planning) ** Or Master of Planning (Transport Planning and Logistics Management)* **at SPAD and SPAV *at SPAB	29	25	25
Master of Planning (Urban Planning)	39	-	-
Master of Planning (Housing)	29	-	-

Minimum qualifying marks: Candidates with at least 55% marks or 6.0 CGPA at the qualifying examination, or 50% marks or 5.5 CGPA for the reserved categories SC/ST/ PwD

Applicants may visit the official websites of SPA, Delhi, Bhopal and Vijayawada for Course Details

Selection Criteria:
Selection of candidates shall be based on:
1) Performance in Qualifying Examination;
2) *Valid GATE/CEED/UGC-NET Score, as applicable;
3) Physical Interaction, and 4) Work Experience

For further details visit the official website of JAAP PG 2025 (<https://jaappg.admissions.nic.in/>)

Important Dates

1. Date of opening of online applications	06th May 2025
2. Date of opening of Payment Link	09th May 2025
3. Date of closing of applications	30th May 2025
4. Display of list of eligible applicants for Interaction	04th June 2025
5. Physical Interaction (may include interviews, portfolio assessment, group discussions, essay writing on specific topic, SoP and exam etc. at SPA Delhi	16th June 2025 – 21st June 2025
6. Announcement of Result / Display of the Rank List	26th June 2025
7. Seat Allotment and Various Rounds of Counselling	26th June 2025 to 21st July 2025
8. Display of Information Regarding SPECIAL ROUND of Counselling	26th July 2025
9. Physical Document Verification (in person at allotted institutions) and Commencement of Classes.	as per dates displayed by the respective Institutions at their Websites

General Instructions:
1. Application fee is ₹ 3,000/- (Non-refundable), for Indian Nationals. For reserved categories SC, ST, and PwD categories, the application fee is ₹ 1500/- (Non-refundable).
2. The Foreign Nationals/ NRI/ PIO/OCI seeking admission in any of the Postgraduate Courses shall apply separately through DASA 2025 portal.
3. Candidate can exercise any number of choices based on eligibility for the course applied for in any of the Institutions.
4. Admission to Post Graduate Degree Courses against Kashmiri Migrant Reserved Seats as per the rules over and above the total number of PG seats of the respective Institute.
5. 5% seats are reserved for persons with benchmark disabilities on horizontal basis. These shall be adjusted against the respective reservations for OG, SC, ST, EWS and OBC (NCL) Categories as per provision for PwD reservations, Government of India.
6. Institutions reserve the right to give admissions up to 10% of the intake as supernumerary seats.
7. GATE/UGC-NET qualified and CEED qualified candidates having valid Score Card shall be eligible for the scholarship.
8. Institutions reserve the right to reject/cancel any application without assigning any reason.
9. All dates mentioned may subject to change.
10. Candidates in final year may submit marksheet / transcript/ grade sheet till the pre-final year. In such cases, all admissions shall be provisional subject to the fulfillment of the eligibility criteria after receiving the final result in the qualifying examination.
11. Sponsored candidates from Government organizations, quasi-Government organizations, PSUs should apply through proper channel and the Selection Criteria for such candidates MAY BE relaxed as decided by the Selection Committee considering the suitability of the candidate on case-to-case basis. Such candidates shall apply separately through the websites of respective Institutions.
For any clarifications, candidates may contact: jaappg2025@spa.ac.in
Registrar, SPA, Delhi
JAAP PG 2025, Host Institution

Patkai Alumni Badminton Championship 2025 ayongzük



Dimapur, Monupii/May 09 (TYO): Patkai Badminton Club ajanga May 9, 2025 nü Dr. H. Ibotombi Singh, Patkai Indoor Stadium, Patkai Christian College nung mezüngbuba Patkai Alumni Badminton Championship 2025 ayongzüka liasü.

'More than a game' omen nung ajemdaker ayongzükba

asayamung nungya team 16 dena liasü.

Sentong nung alakteta jaoker ama Founder Principal Emeritus, Rev. Dr. Tuisem A. Shishak ajanga alumni tem nem tenüngsang agüja liasü.

Pai alumni tem ajungmeso aser stadium ya Patkai community atema ainba, lungjemba aser tejakleni aoba

temaitsü tongtipang lir ta ashi. Cambridge, Havard aser Stanford amala university tem ya alumni tem ajanga alir ta pai ashi.

Pai iba asayamung nung shilem agirtem dang Khristan yimsü nungi tajung aser tamajung angatetba mebilatettsü aser anogoshia pei tamangba yimsü sülen anidaktsü tongtipang ta ashi.

Dr. Thepfuvilie Pieru, Principal, PCC ajanga mezüngbuba Patkai Alumni Badminton Championship tenzükja liasü.

Iba asayamung tenzük dang Somingam Shimray, President, Patkai Badminton Club, PCC ajanga pela agizükba o jembi aser Avono Iralu, Assistant Professor, Dept. of Biblical Studies, PCC ajanga sarasadema liasü.

Tensa majungba mechi hopta ka atema IPL 2025 thinena lir

New Delhi, Monupii/May 09 (Agencies): India aser Pakistan tsüngta tensa majungba mechi 18 buba Indian Premier League hopta ka asoshi thinena lir, aser kiralongrari amakba atema linüki telangzüba agütsüdang linük tejangraba mezüng südaktsüsüla, ta BCCI ajanga ashi.

Brehostibarnü Dharamsala nung Punjab Kings aser Delhi Capitals tsüngta asaya tom nung lia anasa Jammu aser Pathankot yimitem nung air raid alerts agütsüba sülen iba asaya athi aser IPL 2025 koma asütsüar mejangjai lir.

Mezüngbo iba asayamung ya mapang telatet makai anenogo ta osangtem prokshia liasü, saka BCCI ajanga hopta ka atakzüka lir.

"BCCI ajanga tang tesayadak IPL tanüngba asaya

tang nungi tenzük hopta ka atema anena atatsü telemetba agiogo," ta BCCI secretary Devajit Saikia-i sangdong ka nung ashi.

"Tapet ketdangsür aser stakeholders den shisa agitepa tensa kanga junga asadangba sülen asayamung anogo aser sentongtem indang osang sangdongtsü," ta sangdong ajanga ashi.

IPL 2025 ya Deobarnü (May 25) Kolkata nung tembangtsü liasü. BCCI ajanga tanüngba asaya 16 atema mapang tetemsü nung reprangtsü aser Asia Cup ya masayara September ita asayatsü akok.

"Tang iba ama tensa nung linük den BCCI akang-akang nokdaka lir. Government of India, Armed Forces aser asen linük nüburtem den onok dena aliba lemsateper," ta sangdong

ajanga ashi.

"Board-i temulun tulu, tasü tait aser anibelem mesasai tenzükba asen armed forces nem akhum agütsür, shirnoki Operation Sindoor kübok tasü ita asen linük maneni kumzüka ayur, aser tawa kiralongrari amakba nung telangzüba tajung agütsür," ta BCCI sangdong ajanga ashi.

Official broadcaster, title sponsor aser associate partners amala stakeholders temi danga maparen ajak yutsür linük tejangraba mezüng südaktsüba asoshi BCCI-i pelaba lemsateper.

April 22 nü Pahalgam nung kiralongrar temi nisung 26 tepsetba sülen hopta ana lir India-i Pakistan aser Pakistan Occupied Jammu and Kashmir nung kiralongrar indang ki o jen nung missile amshia amak.

India tetsür football team Uzbekistan den friendly ana asayatsü

Monupii/May 9, 2025 (Agencies): India senior tetsür team May/June window nung Uzbekistan den FIFA international friendly ana asayatsü, ta All India Football Federation-i Brehostibarnü metetdaktsü.

Uzbekistan den asaya ana ya ka May 30 aser ka June 3 nü Bengaluru nung Padukone-Dravid Centre for Sports Excellence nung asayatsü.

India tetsür team Crispin Chettri lenisüba nung AFC Women's Asian Cup 2026 Qualifiers atema renemdar aser parnok camp Bengaluru nung May 1 nü tenzükogo.

India team Group B nung Mongolia, Timor-Leste, Iraq, aser hosts Thailand den Chiang Mai nung asayatsü renema lir.

India team tang FIFA

Women's Rankings nung jenjang 69buba nung lir aser parnok 50buba nung aliba Uzbekistan team den taoba mapang 13benbo asayaogo.

Linük ana tsüngda asaya Uzbekistan team-i tekuben aser India team-i khen koker lir. Tanungba asaya asem ya draw nung tembanga liasü.

May 30: India vs Uzbekistan; Padukone-Dravid CSE

June 3: India vs Uzbekistan; Padukone-Dravid CSE

India team atema shimba asayartem:

Goalkeepers: Payal Basude, Elangbam Panthoi Chanu, Keisham Melody Chanu, Moirangthem Monalisha Devi.

Defenders: Purnima Kumari, Phanjoubam Nirmala Devi, Martina Thokchom, Shubhangi Singh, Sanju, Malati Munda, Toijam Thoibisana Chanu,

Sorokhaibam Ranjana Chanu, Nangbam Sweetie Devi, Viksit Bara, Hemam Shilky Devi.

Midfielders: Kiran Pisda, Nongmaithem Ratanbala Devi, Muskan Subba, Lisham Babina Devi, Karthika Angamuthu, Cindy Remruatpuii Colney, Sangita Basfore, Priyadharshini S, Baby Sana, Santosh, Anju Tamang.

Forwards: Mousumi Murmu, Malavika P, Sandhiya Ranganathan, Soumya Guguloth, Sulanjana Raul, Lynda Kom Serto, Rimpa Haldar, Manisha Naik, Renu, Karishma Purushottam Shirvoikar, Sumati Kumari, Manisha Kalyan, Grace Dangmei.

Head Coach: Crispin Chettri
Assistant Coach: Priya PV
Goalkeeper Coach: Dipankar Choudhury.

2027 FIFA Women's World Cup Maracana nunga asayatsü



Monupii/May 9, 2025 (Agencies): Brazil nung 2027 küm tetsür World Cup asayatsü atema FIFA-i Bodhbarnü venue tem sangdongba nung Rio de Janeiro indang Maracana stadium-a densema lir.

Belo Horizonte, capital Brasilia, Fortaleza, Porto Alegre, Recife, Salvador, aser Sao Paulo nunger nunga asayatem ayongzüka asayatsü

Item stadium tem ajak ya 2014 küm Brazil nung teburtem

World Cup ayongzüka asayaba mapang asayatem asayaogo.

Küm ter tejakdang tebur World Cup final nung Germany-i mapang apuloktsür asayaba mapang Argentina koka liasü aser 2027 küm tetsür WC final ya Maracana nung asayatsü.

"Samba nungi frevo, tebur tajung tzüküm nungi cosmopolitan yimitem ta alimai tashi, sentsü aser telemla ajangshitsü, koba Brazil-i dang agütsütettsü," ta FIFA tir Gianni Infantino-i ashi.

"Tetsürtem asaya kanga kara renloka odor aser iba asayamung Brazil nung asayaba ajanga iba continent aser linük balala nung aliba lanurtem ajungmesotsü," ta FIFA secretary general Mattias Grafstrom-i ashi.

Asayamung ayongzüka asayatsü atema yimti 12 shimba nungi yimti ti ya shimogo. Belem, Cuiaba, Manaus aser Natal nunger züngtokogo.

BENDANGLI OSANG : Tapak 7 nungi...

Russia nung Victory Day mungogo...

Russia indang Kursk region nung North Korean sepai meyrirjang aika Ukraine sepaitem anema raraogo aser Putin-i Red Square nung sepai kar ajurua lenir ka dak aziüta liasü.

North Korea lenir Kim Jong Un-i Moscow den par linük tesendaktep tali akuma temaitsü pai Pyongyang nung Russian embassy semdanga liasü.

Iba anogomung nung ainer tem rongnung Brazil Tir Luiz Inacio Lula da Silva, Venezuelan Tir Nicolas Maduro aser Serbian Tir Aleksandar Vucic nunger liasü aser European Union lenirtem rongnungi Slovakia Ato Kilonser Robert Fico kisüing liasü.

Iba anogo matongdang EU foreign policy chief Kaja Kallas-i EU züngsem linük lenirtem aser union nung adentsü jangra aliba linüktem nungi iba sentong nung shilem magütsü jangja-jangja shia lir. Serbia ya EU candidate linük ka lir aser Vucic-i iba sentong nung adentsü telemetba agiba ajanga pai timtem ajurutsü imlar ta shia liasü.

Putin asoshibo Victory Day nung Xi Jinping adenba ya takok tuluka ama ajiteter aser pai World War II nung Russia tembar linüktem nem akhum agütsüba mapang China nunger tasü aitba tushia liasü.

Japan den raraba nung China sepaitemi shilem tejangja agiaka Taiwan nung aliba sorkaribo Beijing aser Moscow ajanga puti otsü raksatsü ta ashir.

Parade malidang Putin aser Xi na senden anaben mena liasü aser ano Ukraine nung rara indanga sensaksem, ta China nunger osang ajanga ashir.

Parade nungya Yars missile systems, tanks aser armoured personnel carriers densema Russian military hardware tabu balala sayua liasü. Parade tembanga Su-25 military jets trok Red Square alema yima ao.

Ukraine Tir Volodymyr Zelenskyy-i iba sentong nung adener kumzüka ayutsü asoshi guarantee magütsütettsü ta tekum dangtsü ashi aser linük balala lenirtem dang Moscow-i maotsü ajungshia liasü.

Brehostibar nikongdang jembidang, tang nungi tenzük ceasefire rangben tenzüktsü Ukraine renema lir, ta Zelenskyy-i shia liasü.

"Saka ibaji asangsang asütsüla. Missile mesüra drone amshia amakba malitsüla, front nung amakba malitsüla," ta pai video ka X nung lemsatepba nung ashi.

Pau Russia dang ceasefire bhukumtsü ayongzük aser rara tembangtsü mulunga aliba kuli tejangja sayutsü ashi.

BILEMDANGANG

"Takok tajung angutsü atema mapang nüngdaker."